

SINDIKATUEKIN ETA ENPRESARIEKIN NEGOZIATU GABE, IRAILEAN ENPLEGU PLAN BAT JARRIKO DU ABIAN

# Lau urtetan milioi bat enplegu sortu nahi du PPren Gobernuak

■ Datozen lau urteetan milioi bat enplegu sortu nahi du Madrilgo Gobernuak. Horixe da gobernuak irailean abian jarriko duen enplegu planaren xedea. Madrilek ez du lanpostuak sortzeko plan hori sindikatuekin eta enpresariekin negoziatzeko asmorik.

Erredakzioa / Donostia

ENPLEGU berriak sor daitezen Espainiako Gobernuak erabiltzen dituen bitartekoak % 30 haziko dira heldu den urtean. Aurten 310.000 milioi pezeta inguru bideratuko dituzte enplegu politika aktiboak abian jartzeko, eta heldu den ekitaldian, aldiz, 400.000 milioi pezeta inguru (16 miliar libera). Enplegu sustapenerako planak aurrera ateratzeko izango duten aurrekontua, esaterako, aurtengoa baino % 40 handiago izango da. Hala, enpresariak enplegu egonkorra egin ditzaten ehun mila milioi gehiago erabiliko ditu Madrilek, eta lanbide prestakuntzarako aurrekontua aurtengoa baino % 15 handiago izango da. Hala iragarri zuen atzo Manuel Pimentel Espainiako Enplegu idazkaria. Enplegu politika pasiboak sustatzeko bitartekoak, ordea, behera egingo dute 1998. urtean.

Pimentel oso kontent dago enplegu sorreraren bilakaera dela eta. Urtean Espainian laurhun mila enplegu berri sortzen ari direla dio Madrilgo gobernuak arduradunak. Joera horri eutsi ahal izateko, interes tasek egonkor eta apal egon behar dutela uste du Pimentelek, horrek inbertsioak eta enpleguak eragiten dituelako. Urte hasieran Espainiako Gobernuak egin zituen prebisioak —aurten 234.000 enplegu berri sortzea— errez betekoa direla ere ziurtzat eman du Enplegu gaietarako arduradunak. Hala eta guztiz ere, Espainia Europako Batasuneko batez bestekoetatik oso urrun dagoela gogorarazi du Pimentelek.



Manuel Pimentel, Espainiako Enplegu idazkaria.

DUEÑAS / EFE

**Enplegu plana** ● Espainiako Gobernuak datozen urteetarako enplegu plan bat lantzen ari dela ere iragarri du Pimentelek. Oso litekeena da irailaren erdi aldera Ministroen Kontseiluak egitasmo hori onartu eta abian jartzea. Gobernuak ez du egitasmo hori gizarte eragileekin, sindikatuekin eta enpresariekin, negoziatzeko asmorik, nahiz eta Madrilek haien proposamenak jasotzeko «jarrera irekia» duen. Planaren xedea lau urtetan milioi bat enplegu berri sortzea da. «Enplegurako ekimen hori ez dugu negoziatuko. Hala ere, gizarte eragileek beraien proposamenak egingo dituztela espero dugu».

Egitasmoa ez da enpleguak sortzeko plan bat izango. Izan ere, Frantziako Gobernuak gazteentzat enplegua sortzeko plana desegokitzen jo du Madrilek. «Gizarteak enpleguak sor ditzan bultzatu behar dugu, baina Estatuak ezin ditu bere bizkarrean hartu une jakin batean sortutako enpleguak».

Pimentel El Escorialen izan zen atzo, udako ikastaro batean. Ikastaro berean parte hartu duten aditu gehienek arabera, Frantziak indarrean jarriko duen gazteentzako enplegu plana ez da egokia. Lionel Jospinen gobernuak gazteentzako 350.000 enplegu berri sortu nahi ditu

datozen bost urteetan, eta horretarako 300.000 milioi pezeta erabiliko ditu datorren ekitaldian (12 miliar libera). Luis Enrique de la Villa eta Jose Antonio Sagardoy El Escorialeko ikastaroan parte hartu duten katedradunek esan dutenez, esaterako, Frantziako plan hori ez litzateke bideragarria izango Espainian. Dena dela, De la Villak azpimarratu duenez, «gizarteak behar egonkorrrak sortzeko baliogarriak badira, Jospinen gobernuak enplegu esparru berrien gainean egindako lana txalotzekoa izango litzateke». Hala ere, diruz lagundutako enpleguak sortzea arriskutsutzat jo du De la Villak. X

## laburrean

### ■ Autopistako tarifen BEZa % 7ra jaistea aztertzen ari da Madril

AUTOPISTAKO tarifen prezioa jaistea aztertzen ari da Madril. Zehazki, autopisten gaineko zergak jaitsi nahi ditu Gobernuak. Uneotan, autopisten BEZa (Balio Erantsia-aren Zerga) % 16 da, eta Gobernuak % 7ra jaitsi nahi du zerga hori, Joaquim Molins CiU koalizioak Kongresuan duen bozeramaileak iragarri duenez. Oso litekeena da jaitsiera horren gaineko behin-betiko erabakia ostiralean bertan onartzea. X

### ■ Alemaniako esportazioek % 11 egin dute gora lehen urte erdian

ALEMANIAKO esportazioek gora egin dute urtariletik abuztura arte. Zehazki, % 11 egin dute gora Alemaniako esportazioek. Alemaniak egin dituen inportazioek ere gora egin dute, baina hazkundea apalagoa izan da, Alemaniak kanpo erositako produktuek % 7,9 egin baitute gora urtariletik ekainera arte. Uneotan, Alemaniako esportazio superabita 32.222 milioi dolarrekoa da. X

### ■ Ezinduen pentsioek % 4,65 egin dute gora Hego Euskal Herrian

EZINDUEK Gizarte Segurantzatik hilero jasotzen dituzten pentsioek % 4,65 egin dute gora Hego Euskal Herrian iaztik, Lan Ministerioak zabaldu-tako datu estatistikoen arabera. Araba, Gipuzkoa eta Bizkaiko ezinduek batenaz beste 98.100 pezeta jasotzen dituzte hilero (3.924 libera). Nafarroakoek, aldiz, 87.000 peze-ta. Espainian batenaz beste 75.894 pezetako pentsioa jasotzen dute ezinduek. Espainiako pentsioen igoera % 4,3koa izan da iaztik. X

### ■ Iazko lanaldia aurreko urtekoa baino bost ordu luzeagoa izan zen

ESPAINIAN batenaz besteko lanaldia 1.769 ordu eta hamar minutukoa izan zen 1996an, aurreko urtean baino bost ordu luzeagoa, Espainiako Kontseilu Ekonomiko eta Sozialak (KES) bere urteko txostenean jasotako datuen arabera. E-maila horiek jakiteko KESek lan hitzarmen-tan langileek eta enpresarioek hitzartutako akordioak hartu ditu kontuan. Ordu estren kopuruak ere gora egin zuen iaz. Orotara 62 milioi ordu estra egin ziren aurreko urtean. Dena dela, azken bost urteetan ordu estren kopurua murriztuz joan da, 1991. urtean 75 milioi ordu estra egin baitziren Espainian. X

## Volkswagenen hornitzaileentzat 400.000 metro koadroko industrialdea eraikiko dute Landabendik gertu

■ 98ko udazkenerako bukatu nahi dute, eta Nasuinsa elkarte publikoak 2.000 milioi pezeta inbertituko ditu

Erredakzioa / Iruñea

NASUINSA-K, zoru industrialaren sustapenerako enpresa publikoak, 400.000 metro koadroko industrialdea eraikiko du Arazurin, Landabengo Volkswagenetik hurbil. Nafarroako Gobernuak era guztietako erraztasunak eskaini nahi dizkie Volkswagenen hornitzaileei, are gehiago Iruñeko lantegiak Alemaniako multinazionalaren auto modelo berria (Lupo) bereganatzeko aukera handiak dituela

jakinda. Horretarako ia 2.000 milioi pezetako inbertsioa egiteko prest daude Nafarroako agintariak. Arazuriko industrialdea 1998ko udazkenerako amaituta eduki nahi dute.

Udako oporrak hasi aurretik, Nafarroako Gobernuak bozeramaileak iragarri zuen zoru industrialaren sustapenerako enpresa publikoa bultzatzeko asmoa zutela. Asmoa aspaldikoa zen, baina orain arte zehaztu gabe zegoen. Nasuinsa uda hasieran eratu zen, 1.700 milioi pezetako

kapital sozialarekin. Elkarte publikoko akziodun nagusia Nafarroako Gobernu da, kapitalaren % 60ekin; Espainiako zoru sustapenerako elkarteak (SEPES) % 15 du, Nafarroako Aurrezki Kutxak % 10, Euskadiko Kutxak % 5, Caja Ruralek ere % 5 eta Sodenak beste % 5a.

Nasuinsa eratu bezain pronto, uztailaren 4an, azkiodunen batzarrak Volkswagenen hornitzaileentzat proiektu bat eskatzea erabaki zuen. Proiektua datorren astean aurkeztuko die-

te Nasuinsako akiodunei. Elkarte publikoko administrazio kontseiluak onartzen badu, berehala hasiko dituzte lanak. Zoru industrialaren salmenta Nasuinsak berak kudeatuko du. Elkarteko buruen ustez, laster salduko dute zoru guztia, Volkswagenen hornitzaileak horren esperoan omen daudelako aspalditik.

Miguel Sanz Nafarroako gobernuburua Alemaniara joango da aurki Volkswageneko goi karguei proiektuaren berri ematera. X